

【经文信息】大正藏第 19 册 No. 0980

大胜金刚佛顶念诵仪轨 1 卷

No. 980

大胜金刚佛顶念诵仪轨

南天竺三藏金刚智奉 诏译

尔时世尊为末世一切众生故。现五种光明。从顶上放火光。照三界所有恶魔鬼神等不信佛教者。同时悉焚烧。金刚手菩萨见是相已。白世尊言。如来智火被烧所有天魔鬼神于众生生害者。悉恐怖不得安乐。欲说何法。唯愿如来演说。尔时大毘卢遮那佛告金刚手菩萨言。有明王名大胜佛顶心呪。诵一遍所求满足。十方诸佛中最胜明王。若有金刚子。诵满五万遍。一切诸佛大菩萨天龙天女众。昼夜共守护令成所愿。尔时如来说明曰。

唵么贺缚日罗(二合)瑟拏(二合)洒吽(引)怛路(二合)濼利(二合)恶(入)吽(引)

二手内缚忍愿屈如顶。是名根本大印。若有末法转时。有诸众生常结此印持念真言者。一切兵力不能相害。水火不焚漂。不便一切恶魔恶鬼。金刚胎藏圣众坐卧咸来增拥护。

复次说画像法。于黑月房宿取清净绢素。画大胜明王。戴五佛冠。出现十二臂。住智拳印。执五[月*古]青莲花宝珠羯磨钩索锁铃利剑轮等印。安住千叶白莲华。身色如白光。遍身成火光。四角画四明王。东南角画不动金刚。西南角马头金刚。西北角六足金刚。东北角药叉金刚。画此四忿怒王。各执器械。现极猛利势。次画八方天王。各辵眷属恭敬围绕。若有真言行者欲供养者。于净室及山林静静处。烧香散时花。念诵真言五十万遍。我及八佛顶无量天菩萨金刚天等。现身常随意奉仕。若有众生每日诵持此真言。于现在生之中。胜一切天人。当末世中。身如遍照尊。持此印真言者。能成就十亿种所愿。复若有行者。作种种降魔及一切阿尾舍法者。我作十千金刚童子。则随意持诵者常住。若悲心莫他相憎。观吽字心上。行住坐卧住本尊三摩地。成就一切愿。有情见者。悉欢喜爱念。此人如遍照尊。无量诸佛常来覆护不

舍。真言行者不起贪瞋痴等烦恼。深归命三宝。以善根回向六道者。必速证无上菩提。行者诸秽处用乌瑟拏摩金刚呪印加持五处。以右手四指作拳。直竖弹指。密言曰。

唵俱路(二合)驮曩吽弱

大胜金刚佛顶念诵仪轨

一校了

康元二年二月二十九日

于觉洞院书写之了

金刚佛子 亲尊(二十二)

【经文信息】大正藏第 19 册 No. 0980 大胜金刚佛顶念诵仪轨

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
